

समा - 12:25 hrs.

<><><><><><>

#### Parliament Adjourned

बिहार च मतदाता सूचियें दी विशेष गहन नजरसानी आले मामले पर विपक्ष दे शोर-शराबे दे चलदे लोकसभा दी कारवाई दपैहरी तोड़ी ते राज्यसभा दी कारवाई दपैहरी 2 बजे तोड़ी स्थगित करी दिती गई। स्पीकर होरें कारवाई गी चलाने दी कैंई बारी कोशिश कीती पर शोर-शराबा जारी रेया जेदे चलदे दौनें सदनें दी कारवाई गी किश चिरे लेई स्थगित करी दिता गया। लोकसभा दी कारवाई स्थान मगरा जिसलै परतियै शुरु होई गई ते फही इसी बनमित्थे समें आस्ते स्थगित करी दिता गया।

<><><><><><>

#### Kmr- Water Sports

अज्जै थां श्रीनगर दी डल झील कश खेड्डें दे उत्सव खेलो इंडिया वाटर स्पोर्ट्स फेस्टिवल 2025 शुरु होआ रदा ऐ। ए इस खिते च होने आला अपनी किस्मा दा पैहला ऐ। एहदे च 36 राज्यें ते केन्द्र शासित प्रदेशें दे 800 थमां बद्द खडारी कयांकिंग, कैनोइंग, रौइंग ते नेइएं होर गतिविधिएं च हिस्सा लैडन। इस कार्यक्रम दी शुरुआत संजा 6 बजे होग। इस दुरान शानदार उद्घाटनी समारोह आयोजित होग जेदे च ड्रोन शो, लोक नाच बगैरा शामिल न। एह आयोजन जम्मू-कश्मीर दी सैलसफा समर्थ, संस्कृति ते दस्तकारी गी प्रदर्शित करने दा इक मंच उपलब्ध

करोआग। एहदा सरिस्ता जम्मू-कश्मीर खेड्ड परिषद ते युवा मामलें सरबन्धी मंत्रालय आसेआ कीता जा'रदा ऐ।

<><><><><><>

Sakeena- Education

शिक्षा मंत्री स्कीना इतू होरें आकखेया ऐ जे समकालीन चुनौतियें दे हल ते ज्ञान आधारत समाज लेई शोध-आधारत शिक्षा बड़ी महत्वपूर्ण ऐ। मंत्री होरें एह गल्ल GGM साईस कालेज आसेया आयोजित बक्ख-बक्ख शोभें च होआ रदे- शोध सरबन्धी दंऊ-रोजा अंतराष्ट्रीय सम्मेलन गी सम्बोधत करदे होई आकखी। अपने सम्बोधन च मंत्री होरें GGM साईस कालेज दी शैक्षणिक उत्कृष्टता लेई वचनबद्धता ते युवा शोधकर्ताएं गी इक मंच उपलब्ध करोआने लेई सराहना कीती।

<><><><><><>

Satish –Tech Innovations

साईस ते टैक्नालोजी मंत्री सतीश शर्मा होरें टैक्नालोजी ते उद्योगें बश्कार बेहतर तालमेल पर बल पाया, तां जे नमीं टैक्नालोजी ते काड्डें राएं जमीनी स्तह पर लोके दिये जायज जरूरतें गी बेहतर ढंगे सिर पूरा कीता जाई सकदा ऐ। मैहकमे दी जायजा बैठक च बोलदे होई मंत्री होरें आकखेया जे आधुनिक टैक्नालोजी शड़ी लैब्राट्रियें तक्कर गै सीमित नैई रौहनी लोड़चदी, सगुआ इस्सी जमीनी स्तह पर आन्नियै, इसी लागू करियै, लोके मुजब हल उपलब्ध करोआइयै, समाज गी सिददा लाह पजाना लोड़चदा।

<><><><><><>

Chishoti Search Op.

किश्तवाड़ जिले दे चशोती ग्रां च बददल फटने मगरा राहत ते बचाव आला कम्म 8में रोज बी जारी ऐ। इस घटना च 65 लोक मारे गे, इन्दे च CISF दे 3 कर्मी ते जम्मू-कश्मीर पुलस दा इक SPO शामिल ऐ।आकाशावाणी जम्मू संवाददाता दी रिपोर्ट मुजब इस घटना च 100 लोक घायल होए ते 70 लोक अर्जे बी लापता न। सेना, NDRF, SDRF, CISF, सीमा सिड़क संगठन, पुलस ते मुकामी लोक किट्ठे रलियै राहत ते बचाव कम्म गी अंजाम देया रदे न। एदे च भारी मशीनें दे इलावा खोजी कुतें दी बी मदद लैती जा रदी ऐ। सेना आसेया बनाए गेदे पुल करी बी इस बचाव अभियान गी बल थहोआ ऐ। गृह मैहकमे दे प्रधान सचिव चन्द्राकर भारती होरें कल इस इलाके दा दौरा लाया हा ते जमीनी सतह पर चला रदे राहत ते बचाव कम्में दा जायजा लैता।

<><><><><><>

Samba Accident (Dispatch)

अज्ज बड़्डलै साइडे 3 बजे दे करीब साम्बा जिले दे जटवाल कश उत्तर-प्रदेश थमां श्री माता वैष्णो देवी कटरा जा रदी इक बस दा टायर फट्टी गया ते बस पटलोई गई- जेहदे च इक श्रद्धालू दी मौके पर गै मौते होई गई ते 39 होर जखमी होए न। साम्बा पुलस मौके पर पुज्जी ते जखमी होए दे श्रद्धालुं गी सरकारी जिला अस्पताल ते किशें गी विजयपुर दे AIIMS

अस्पताल पजाया। मुखमंत्री उमर अब्दुल्ला होंरें साम्बा च पेश आए दे इस सिड़क हादसे पर दुख ते बसोस जाहिर कीता ऐ, उनें घायलें दे तौले नरोए होने दी कामना कीती।

<><><><><><>

#### Weather

मौसम विभाग नै औने आले किश दिनें च भारी बरखा ते चानचक्क हाड़ औने दी पेशगोई कीती ऐ। आकाशवाणी जम्मू संवाददाता नै विभाग दे हवाले नै जानकारी दिती ऐ जे जम्मू, रियासी, उधमपुर, साम्बा, कठुआ ते राजौरी, 22 अगस्त रातीं किश थाहरें पर भारी बरखा होने दी पेशगोई कीती गेई ऐ। 23 थमां 26 अगस्त तगर जम्मू-कश्मीर दी केई सारी थाहरें पर भारी बरखा पौने ते अंधी झक्खड़ झुल्लने दे असार दस्से न। ओब इलाके जेड़े मते प्रभावित होगन उन्दे च जम्मू- रियासी- उधमपुर- साम्बा- कठुआ-राजौरी- अनंतनाग ते कुलगाम शामिल न। मौसम विभाग नै पुंछ, रामबन, डोडा ते किश्तवाड़ च दरम्याने दर्जे थमां भारी बरखा बरने दे असार दस्से न।

<><><><><><>

#### PTC Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते

पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौंहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट [www.newsonair.gov.in](http://www.newsonair.gov.in) पर उपलब्ध ऐ।

<><><><><><>